

# Hilaric cun Hilarius

A Surcuolm ha Surselva Turissem inaugurau venderdis vargau la senda divertenta dil petgalenn Hilarius. La nova attraccziun ei in product digl indigen Benedikt Alig alias Fudl.

AUGUSTIN BEELI/FMR



Il petgalenn Hilarius.

Ton interessanta e captivonta che la finamira d'ina senda instructiva ei, sa ella esser schetga e lungurusa ella pratica. Cunzun affons vulan buca exnum empernder ellas vacanzas, mobein se divertir. La senda ch'ei aviarta ufficialmeins dapi venderdis a Surcuolm corrispunda tuttaviva buca a quei maletg. Sco quei che *Antonina Tschuor*, la menadra dil biro da Surselva Turissem, ha tradiu a caschun dalla presentaziun, ein ils emperns resuns ordvart positivs. «Veramein tuts, seigi pign ni grond, ein incantai da quella figura divertenta, dallas historias e dallas canzuns.»

## Tut ha «Fudl» fatg sez

Ils hospes ch'ei in vacanzas ella regiun, han gia saviu empernder d'enconuscher il petgalenn Hilarius. Ch'igl ei ina senda hilarica e divertenta han ils involvai e representants dallas autoritads lu era saviu perschuader venderdis. *Kevin Brunold*, il meinagestion da Surselva Turissem ed il president communal da Sursaiassa, *Ernst Sax*, enconuschan las habilitads da lur convischin *Benedikt Alig* alias Fudl. Ei para ch'igl um creativ hagi scaffiu cul petgalenn Hilarius ina figura da cult. Igl ei buca ina senda instructiva, era buca ina senda tematica, sco era buca ina senda auditiva sco quei ch'ins s'imaginescha. Sin ina tura da 3,3 km tras uaul e cul tira da Surcuolm dat ei 15 petgas identicas dil petgalenn e 22 ulteriusas figuras. Finadina ha el fatg sez, cun dun artisanal-artistic ha el en-



Benedikt Alig, alias Fudl, creader dalla figura dil petgalenn Hilarius.

FOTOS AUGUSTIN BEELI

tagliau il lenn-larisch culla resgia a motor e colorau las figuras. Sin mintga post dalla senda signalisada specialmeins, presenta ina tabla d'informaziun la historia e l'informaziun da basa en quei liug. Ins sa scannar cul telefonin il code QR ed entscheiver a tedlar. Mintga post ei unics, il raquintader ei mintgamai il petgalenn. En dialect da Sursaiassa, en tudestg grischun ed en auters dialects raquenta Benedikt Alig 15 historias plein fantasia. El plaيدا sez las 30 differents rollas e characters.

Tut ha el fatg sez enteifer cuort temps. Entschiet ad entagliar las 42 figuras ha el il schaner 2021. Parallel ha el scret ils texts, fatg la musica ed arranschau mintga historia sco giug auditiv. Il petgalenn Hilarius entaupa ils pli differents animals, gl'uorsun Bruno, l'uolp Beat, ils stgirats Kurt e Maurus, falians, ca-

mutschs e numerus auters. Il petgalenn intimescha ed envida ils affons da mirar, sedivertir e cunzun tedlar e cantar. Sco quei ch'ins ha s'encurschiu a caschun dalla presentaziun, fascineschan las figuras e las historias divertentas buca mo ils affons. Era ils carschi ein incantai dalla fantasia, ellas historias tut bugli da surprasas ed impressiuns originalas. Benedikt Alig ha scaffiu in product unic, ed ei para ch'ei seigi buca siu davos. Suenter Globi e Mia flotta Lisa-lotta savess Hilarius hilaric suandar.

La senda entscheiva sisum il vitg da Surcuolm (Pradual/Waldeck) e va sur 3,3 km sin vias da funs e d'uaul. Ella cuoza ca. 1½ uras ed igl ei pusseivel da ir cun carrotschas da pops.

# Il scharm dils oldtimers carmala

Dumengia, ils 15 d'uost, envida l'unien «Oldtimerland Graubünden» alla secunda sentupada d'oldtimers Surselva ad Igniu Rabius. Ina roschada possessurs d'oltimeers s'entaupan gia la sonda per guder l'emprema «Carrada Alpina» che meina sur pass, alps e tras cavorgias.

SUSI ROTHMUND/FMR

Ins pudess tertgar ch'enzatgi ord la bransch d'automobils organischeschi la sentupada d'oldtimers Surselva. Igl iniziand ei denton in hotelier ed el realisescha igl event ensem cun *René Müller* che posseda ina carrossaria a Rabius. «Jeu sun carschius si cul plascher per oldtimers e hai empau benzin el saung», di *Manuel Reichenbach*. Il possessur dil hotel Tödi a Trun ei igl iniziand dalla sentupada. Ensem cun enzacons entusiasts d'oltimeers ha el lantschau quella il 2019. Igl uost avon dus onns haveva quell'occurrenza attratg 80 possessurs d'oltimeers (-1989) cun lur vehichels e pressapauca 400 aspectaturas ed aspectaturs. Igl onn vargau ha la sentupada d'oldtimers stuiu vegnir annullada pervia dalla pandemia.

## Oldtimers da tuttas marcas

Tonpli selegnan ils organisaturs sigl inscunter da dumengia. «Noss organisaziun sespleiga relativameins nuncumpleicu. Nus havein gia massa annunzias dil Grischun e dall'entira Svizra, mo era

persunas dall'Italia ni Baviera ein s'interessadas. Cons che vegnan la finfinala a prender part dumengia savein nus buc, ins sto gie buca s'annunziar. La participaziun ei gratuita ed ins po era vegnir spontanameins. Tut ils possessurs d'oltimeers (-1989) da tuttas marcas: autos, tracturs ni motos ed auters vehichels da pli baul ein beinvegni cun lur classichers.» Igl inscunter ha liug dumengia dallas 10.00 – 17.00 a Rabius/Igniu sigl areal d'industria.

## Pass – alps – cavorgias

Gia *Reto Reichenbach*, il bab da Manuel era in grond fan dad oldtimers. En giuvens onns haveva el cumprau in Volvo Amazon e siu fegl ei usa losch possessur da quei vehichel classic. Cul temps ha Manuel Reichenbach aunc cumprau auters oldtimers sco per exempel in Austin Healey ni in Deux Chevaux. «Nossa cuntrada ei bellezza cun tut ils pass, las alps e las cavorgias. Car rond cun in oldtimer pon ins scuvierer quella a moda pacifica e quei lein nus promover. Plinavon lein nus era mantener la cultura dils oldti-

mers e far enconuscenta quella en nossa regiun», declara igl ustier e cuschinier che beneventa savens amatur d'oltimeers en sia casa. Per intensivar empauet las sentupadas dils amatur d'oldtimers, envida Reichenbach mintgamai l'emprema gievgia dil meins a partir dallas 19.00 ad ina sentupada el hotel Tödi. «Aschia san persunas cul medem interess star da cumpignia e sediscuorer», manegia el.

## Carrada Alpina

La «Carrada Alpina» dalla sonda ha liug sin ina part dalla Route des Alpine Circle ch'ei vegnida lantschada dacuort da Grischun Vacanzas. Il termin d'annunzia per quella ei vargaus. Il corso d'autos parta a Trun naven dil parcadi avon il Museum Regiunal Surselva Cuort Ligia Grischa. Da leu va ei sur il pass Lucmagn entochen Blinzuna e sur il S. Bernardino, Spligia, tras las cavorgias da Rofla, Viamala, a Lai, Cuera ed anavos tras la Ruinalta.

[www.oldtimerland-graubuenden.com](http://www.oldtimerland-graubuenden.com)



Tgi che posseda sez in oldtimer sa prender quel ord garascha e prender part spontanameins alla secunda sentupada organisada dall'unien «Oldtimerland Graubünden».

FOTO SUSI ROTHMUND

## TRUN



Trun Cultura ha retschert il dretg da baghegiar per las casas Carigiet e Desax (foto).

FOTO HANS HUONDER

## Trun Cultura surpren las casas Carigiet e Desax

«Igl emper d'uost 2021 – il di dalla mort dad Alois Carigiet – havein nus saviu surprender las casas Carigiet e Desax el dretg da baghegiar per 99 onns. Nus essan pia sin buna via.» Quei scriva Trun Cultura en ina comunicaziun. Possibilitau quei pass hagi la firma Romito SA che ha cumprau omisduas casas e mess ellas a disposiziun a Trun Cultura per in mudest tscheins. Trun Cultura ei in'unien ch'ei vegnida fundada per spindrar la Casa Carigiet ch'ei daventada l'unfrenda d'in incendi. Ord quell'activitad ei allura sedau in project pli grond che cumpeggia ina promozion dalla cultura e digl art a Trun en plirs baghetgs.

## Plans san vegnir concretisai

Entras il dretg da baghegiar per las duas casas eis ei pusseivel a Trun Cultura da concretisar ils plans pil museum Casa Carigiet ed entscheiver cun las preparativas da baghegiar. «Ils cuosts per quell'emprema fasa vegnan cuvretgs grazia ad ina donaziun privata, mo era grazia allas contribuziuns dils commembers, dil sustegn dalla tgira da monuments e dall'assicuranza da baghetgs», scrivon *Lisa Schmidt-Candinas* e *Thomas Imboden* en num da Trun Cultura. La cumissiun da baghegiar sut la bitgetta da *Remo Derungs* vegn a surdar las empremas incaricas per la rumida dils donns caschunai entras il barschament, per segirar ils mirs e las parts dil baghetg ch'ei da mantener. Il tetg da protecciun vegn a restar ed aschia schurmegiar il plazzal.

## In diever complex

Trun Cultura preveda in diever pli complex per la Casa Desax restaurada. El plaunterren duei vegnir endrizzau ina biblioteca publica da litteratura romontscha sursilvana ed ina «loung». Ell'emprema e secunda alzada duein combars d'in segment elavau vegnir endrizzadas en collaboraziun cul hotel Tödi sco partenari. Els tschalers cun arviuls duei vegnir purschiu in restaurant. La tiarz'alzada daventa ina habitaziun per artists ed artistas che collaboreschon cun Trun Cultura. «Aschia survegn quei baghetg da rocoche che sesanfla sut protecciun naziunala danovameins sia funcziun. El survescha la finala sco ligiom denter il museum Casa Carigiet ed il Spazi Spescha che vegn endrizzaus ell'antieriura fabrica da ponn», scriva Trun Cultura.

## Alla tscherca da daners

Per omisduas projects ei Trun Cultura alla tscherca da daners da promozion. Per quei intent ei l'instituziun en contact cun uffecis ed instituziuns. Il medem mument envida ella in e scadin da sustener cun ina contribuziun ils projects previ. (cdm/fmr/hh)

## GLION

## Schar violar senza preannunzia

El Spital regiunal Surselva a Glion vegn purschiu la caschun da schar vaccinar encunter corona senza preannunzia. Quella purchida da «walk-in» vegn offerida venderdis, ils 13 d'uost 2021 dallas 18.00 entochen las 21.00. Sco quei ch'il Spital regiunal Surselva scriva en ina comunicaziun als mieds da massa, vegn quella caschun dada a tuttas persunas naven da 18 onns. (cdm/fmr/hh)



Senza annunzia schar dar il vaccin – Quei ei ussa era pusseivel el Spital regiunal Surselva a Glion.

FOTO SOMEDIA